

Pineqartoq: Sanaartorneq pillugu Inatsisartut inatsisissaattut siunnersuut
(Ineqarnermut, Attaveqarnermut Angallannernullu Naalakkersuisoq)

Saqqummiussissut
Siullermeerneqarnera

Matumuuna Naalakkersuisut sinnerlugit sanaartorneq pillugu Inatsisartut inatsisissaattut siunnersuut saqqummiuppara.

Sanaartornermik pitsaanerusementik aqutsisarnissaq aammalu inatsisitigut tunngaviusut nutarterneqarnissaat siunertaralugit, Kalaallit Nunaanni sanaartornermut inatsimmik peqalernissamik kissaateqarneq naammassiniarlugu siunnersuut saqqummiunneqarpoq, sanaartorfiusut ilusilersorneqartarnerinut kiisalu sanaartornermi oqartussaanerup isumagineqarneranut killissarititaasut erseqqissarneqarnissaat maqaasineqarmat.

Siunnersuut sinaakkutissatut inatsisaavoq, tassanilu sanaartorfiusut ikuallattoornissaq, sillimanissaq peqqinnissarlu eqqarsaatigalugit naammaginartumik sanaartorfigineqarnissaasa ilusilerneqarnissaasalu, aammalu sanaartukkat illuutillu eqqaanni nunaminertat sanaartorfigineqanngitsut naammaginartumik pitsaassuseqarnissaasa illersorsinnaasumillu aserfallatsaalineqarnissaasa qulakkeerneqarnissaa siunertarineqarpoq.

Tamatuma saniatigut illuliornermi malittarisassani sanaartornermut inatsimmik aalajangersimasumik, illuliornermi malittarisassani ilaatigut sillimanissaq, ikuallattoornissaq peqqinnissarlu, illuni teknikkikkut atortulersuutinik ikkussuinissaq, sanaartukkat inissiatut sananeqartut atorneqarnerinut naleqqiullugu naapertuuttumik ilusilersorneqarnissaat, sanaartukkat tikikkuminassusissaat, taamaalillutillu inunnit innarluutilinnit atorneqarsinnaanissaat, aammalu sanaartukkani pioreersuni, taamatullu nutaani nukimmik atuinerup killilerneqarnissaa eqqarsaatigalugit sanaartukkat sanaartorneqartarnerinut ilusilersorneqartarnerinullu maleruagassiornissamut inatsisitigut tunngavissaqarnissaqarnissap anguniarneqarnissaa pisariaqartutut isumaqarfigineqarpoq.

Siunnersuut taamaalilluni tunngaviusumik malitassanik maleruagassanillu, sanaartornermi sanaartukkat sananeqarnissaannut ilusilersorneqarnissaannullu, portussutsinut ungasissutsinullu, sanaartornissamut qinnuteqaatinut piumasaqaatinut nalinginnaasunut aammalu sanaartornermi oqartussaasut missiliuillutik oqartussaanerannut il.il. tunngasunik teknikkimut peqqussutinik sukumiisumik nassuiarneqarsimasunik, illuliornermi malittarisassani aalajangersaanissamut tunngavissanik imaqarpoq.

Siunnersuummi kommunalbestyrelsip sanaartornermi oqartussaasutut suliaminik ingerlatsiinnarnissaa, aammalu sanaartornermut inatsisit inatsisillu tassunga attuumassutillit allat malinneqarnerannik nakkutilliinerminik ingerlatsiinnarnissaa siunnerfigineqarpoq. Taamaalilluni aamma illuliornermi malittarisassani atuuttuni eqqarsaatigisassat tunngavigineqartut malinneqarsinnaappata, kommunalbestyrelsi saneqqutsisinnaanissamut immikkut ittumik akuersissuteqarnissamut periarfissaqartussaavoq.

Aamma siunnersuutip atuutilerneratigut sanaartukkani pioreersuni, taamatullu nutaani innaallagissamik, imermik kiassarnermillu atuinermut uuttuutunik immikkoortunik ikkussuisinnaanissamut Naalackersuisut maleruagassiorsinnaalissapput. Kiisalu siunnersuuteqarnermi sanaartukkat pioreersut tikikkuminassusiinik pitsannguinnissamut Naalackersuisut maleruagassiorsinnaanissamut periarfissinneqarput.

Taamatut oqaaseqarlunga sanaartorneq pillugu Inatsisartut inatsisissaattut siunnersuut Inatsisartuni suliarineqartussanngorlugu saqqummiuppata. Siunnersuutip aappassaanneerneqannginnermini Inatsisartut Attaveqatigiinnermut Ineqarnermullu Ataatsimiititaliaannit suliarineqarnissaa siunnersuutigineqarpoq.